

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI ISNIN, 23 MAC 2015, PUKUL 10.00 PAGI

Bil. 9

PERTANYAAN-PERTANYAAN BAGI JAWAB LISAN

1. PR-1331-L66994
Tan Sri Dato Sri William Mawan Ikom [Saratok] minta **MENTERI LUAR NEGERI** menyatakan apakah status terkini rundingan persempadanan di antara Malaysia-Indonesia yang melibatkan negeri Sarawak & apakah bentuk persetujuan yang telah diambil terhadap kemasukan warga negara tersebut ke Sarawak.
2. PR-1331-L65832
Tuan Wan Hasan bin Mohd Ramli [Dungun] minta **MENTERI SUMBER ASLI DAN ALAM SEKITAR** menyatakan dengan jelas dan tepat punca kejadian banjir lumpur di Cameron Highlands dan langkah yang telah diambil bagi mengatasinya.
3. PR-1331-L66179
Dato' Wira Mohd Johari bin Baharom [Kubang Pasu] minta **MENTERI PENDIDIKAN** menyatakan tentang status PT3 kerana didapati tidak ada angka rasmi dikeluarkan oleh Kementerian terhadap pencapaian PT3. Apakah Kementerian berpuas hati terhadap pencapaian PT3 dalam konteks Pelan Pembangunan Pendidikan Negara yang telah dilancarkan baru-baru ini. Jika ya, apakah Peperiksaan SPM akan diubah atau ditingkatkan konsep dan modus operandinya ke arah yang lebih tinggi.
4. PR-1331-L66151
Tuan Wong Tien Fatt @ Wong Nyuk Foh [Sandakan] minta **MENTERI KESIHATAN** menyatakan rancangan Kementerian sama ada bersedia membeli mesin radioterapi bagi perkhidmatan di Hospital Awam Sandakan untuk kebaikan rakyat Sandakan dan pantai Timur Sabah memandangkan Hospital Kota Kinabalu telah mempunyai sekurang-kurangnya dua mesin tersebut.

5. PR-1331-L66463
Ir. Shaharuddin bin Ismail [Kangar] minta **PERDANA MENTERI** menyatakan sejauh manakah perspektif bahawa pasaran dijangka memberi tindak balas yang sepadan dengan harga rumah, selari dengan harga projek perumahan PRIMA yang puratanya 25 peratus lebih murah daripada harga pasaran. Nyatakan sama ada harga rumah PRIMA mampu menjadi penanda aras kepada projek swasta.
6. PR-1331-L67092
Tuan Manivanan a/l Gowindasamy [Kapar] minta **MENTERI PERDAGANGAN ANTARABANGSA DAN INDUSTRI** menyatakan senarai semua syarikat pemegang Lesen Import (AP) Terbuka bagi semua jenis kenderaan (termasuk motosikal dan kenderaan komersial) yang diimport sebagai *Completely Built-Up Unit (CBU)* dan *Completely Knocked Down (CKD)*. Apakah dasar Kerajaan berhubung pemberian AP Terbuka bagi sektor ini dan adakah dasar ini akan dimansuhkan pada akhir tahun ini.
7. PR-1331-L67171
Datuk Ikmal Hisham bin Abdul Aziz [Tanah Merah] minta **MENTERI PENGANGKUTAN** menyatakan adakah Kementerian akan mengharamkan penggunaan tayar celup memandangkan serpihan tayar jenis itu sering dilihat di atas lebuhraya sehingga menimbulkan kebimbangan tentang risiko keselamatan terhadap pemandu kenderaan yang lain.
8. PR-1331-L66140
Tuan Ignatius Dorell Leiking [Penampang] minta **PERDANA MENTERI** menyatakan jika benar Peruntukan yang dahulunya sering diberikan kepada wakil Parlimen Penampang tidak lagi pada masa kini disalurkan kepada Wakil Parlimen Penampang semenjak Wakil Parlimen Barisan Nasional ditewaskan pada PRU-13 dan sekiranya Peruntukan Parlimen ini masih wujud, kepada siapakah Peruntukan Parlimen Penampang tersebut disalurkan.
9. PR-1331-L65536
Tuan Nogeh anak Gumbek [Mas Gading] minta **MENTERI KEWANGAN** menyatakan tahap terkini hutang isi rumah negara serta usaha jangka panjang dan jangka pendek yang bakal diambil oleh Kerajaan di dalam membantu mengurangkan keperluan untuk berhutang khususnya di kalangan golongan muda.
10. PR-1331-L66680
Dato' Ngeh Koo Ham [Beruas] minta **MENTERI SUMBER MANUSIA** menyatakan prosedur mendapat pembantu rumah dari luar negara dan kenapa proses ini memerlukan bayaran yang begitu tinggi.
11. PR-1331-L65543
Tuan Masir Kujat [Sri Aman] minta **MENTERI PENDIDIKAN** menyatakan sama ada benarkah lepasan Sijil Pelajaran Malaysia (SPM)/Sijil Tinggi Pelajaran Malaysia (STPM) dari negeri Sarawak benar-benar tidak berkelayakan untuk diambil berlatih menjadi guru seperti tersiar dalam surat khabar Borneo Post baru-baru ini. Jika benar, apakah langkah Kementerian untuk mengatasi masalah ini.

12. PR-1331-L66229
Puan Teresa Kok Suh Sim [Seputeh] minta **MENTERI PERTANIAN DAN INDUSTRI ASAS TANI** menyatakan sebab berlakunya kekurangan bekalan ayam belanda semasa musim Krismas 2014 dan kenapakah hanya ayam belanda halal diimport memandangkan kebanyakan pembeli adalah orang bukan Islam. Senaraikan syarikat pembekal yang dibenarkan mengeksport ayam belanda ke Malaysia pada tahun 2014 dan 2015.
13. PR-1331-L66807
Datuk Koh Nai Kwong [Alor Gajah] minta **MENTERI DALAM NEGERI** menyatakan apakah dasar atau ketetapan Kementerian terhadap warga emas yang berumur melebihi 60 tahun memegang kad pengenalan merah kerana kehilangan dokumen pengenalan identiti dan sijil lahir.
14. PR-1331-L67192
Dr. Michael Jeyakumar Devaraj [Sungai Siput] minta **MENTERI PERTANIAN DAN INDUSTRI ASAS TANI** menyatakan taraf sara hidup petani di Malaysia terutama bagi penanam sayur-sayuran dan penternak lembu susu. Apakah langkah-langkah yang sedang diambil untuk menggalak petani dan penternak kecil meningkatkan pengeluaran mereka.
15. PR-1331-L65901
Datuk Madius Tangau [Tuaran] minta **MENTERI PENDIDIKAN** menyatakan adakah Kementerian sedar tentang kewujudan beribu-ribu kerusi dan meja pelajar yang usang dan sudah dilupuskan di sekolah-sekolah menengah di seluruh Sabah terutama sekali di PPD Tuaran, jika sedar apakah langkah-langkah yang telah dan sedang diambil untuk mengganti peralatan tersebut.
16. PR-1331-L66397
Puan Nurul Izzah binti Anwar [Lembah Pantai] minta **PERDANA MENTERI** menyatakan adakah Kerajaan akan meratifikasikan "*Extractive Industries Transparency Initiative*" (EITI), berikutan keperluan kritikal sebuah badan bebas untuk mengaudit dan melaporkan hasil petroleum negara, di kala penurunan harga pasaran minyak mentah.
17. PR-1331-L65408
Tuan Haji Mohd Fasih bin Haji Mohd Fakeh [Sabak Bernam] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan langkah Kementerian bagi membanteras peniaga termasuk pengeluar, pengedar, pengimport, pemborong dan peruncit yang mengambil kesempatan menaikkan harga barang dan perkhidmatan melampau setelah perlaksanaan Sistem Cukai Barang dan Perkhidmatan (GST) yang bermula 1 April 2015 ini.
18. PR-1331-L67236
Tuan Haji Nasrudin bin Hassan [Temerloh] minta **MENTERI SUMBER ASLI DAN ALAM SEKITAR** menyatakan aplikasi sistem amaran banjir di kawasan-kawasan yang mudah dinaiki air khususnya di Pahang.

19. PR-1331-L66020
Dato' Shamsul Anuar bin Haji Nasarah [Lenggong] minta **MENTERI KESIHATAN** menyatakan:-
- (a) kesan yang berlaku akibat bencana banjir di Malaysia; dan
 - (b) jenis penyakit yang wujud akibat bencana ini.
20. PR-1331-L66094
Dato' Dr. Tan Kee Kwong [Wangsa Maju] minta **MENTERI PENGANGKUTAN** menyatakan walaupun pihak DCA telah menganggap kesemua mangsa MH370 meninggal dunia, adakah operasi pencarian bangkai pesawat dan mayat mangsa akan diteruskan.
21. PR-1331-L67210
Tan Sri Datuk Seri Panglima Annuar bin Musa [Ketereh] minta **MENTERI KERJA RAYA** menyatakan status pembinaan Projek Central Spine dan bilakah projek Lebuhraya Kota Bharu-Machang dapat disiapkan.
22. PR-1331-L66426
Raja Dato' Kamarul Bahrin Shah [Kuala Terengganu] minta **MENTERI PERTANIAN DAN INDUSTRI ASAS TANI** menyatakan sementara pihak Menteri menggesa rakyat memulau pihak tertentu atas kenaikan harga barang, mengapakah Kementerian tidak bertindak untuk menggesa atau mengarah pihak-pihak yang mempunyai monopoli di atas barang keperluan utama seperti beras dan gula untuk menurunkan harga barangan-barangan utama ini.
23. PR-1331-L66838
Dato' Abd. Aziz bin Haji Sheikh Fadzir [Kulim Bandar Baharu] minta **PERDANA MENTERI** menyatakan adakah Kerajaan berhasrat menambah aset negara daripada segi bantuan kepada bencana banjir dan adakah Kerajaan juga bercadang mewujudkan satu kumpulan sukarelawan khusus untuk bantuan banjir.
24. PR-1331-L66337
Dr. Tan Seng Giaw [Kepong] minta **MENTERI PENDIDIKAN** menyatakan faktor-faktor yang menghalang pendidikan negara ini mencapai tahap dunia. Apakah langkah-langkah untuk mengatasinya.
25. PR-1331-L65700
Datuk Seri Noh bin Haji Omar [Tanjong Karang] minta **MENTERI PERDAGANGAN ANTARABANGSA DAN INDUSTRI** menyatakan pencapaian pelaburan di setiap negeri untuk tahun 2014 dari segi pelabur domestik dan pelabur luar negara.
26. PR-1331-L66696
Tuan Shamsul Iskandar bin Mohd Akin [Bukit Katil] minta **PERDANA MENTERI** menyatakan berapakah jumlah wang yang telah dibelanjakan bagi tujuan siasatan, pendakwaan dan kos Mahkamah di dalam kes PP vs Datuk Seri Anwar Ibrahim pada tempoh hampir tujuh tahun sejak 28 Jun 2008.

27. PR-1331-L65765
Datuk Bung Moktar bin Radin [Kinabatangan] minta **PERDANA MENTERI** menyatakan tentang perancangan jangka pendek dan jangka panjang Kerajaan dalam memulihkan ekonomi negara serta apakah langkah yang sedang dirangka dalam meyakinkan rakyat tentang kemampuan Kerajaan untuk memulihkan ekonomi Malaysia.
28. PR-1331-L66855
Tuan Lim Guan Eng [Bagan] minta **MENTERI KEWANGAN** menyatakan apakah hutang Kerajaan Persekutuan termasuk keuntungan liabiliti dan strategi serta langkah-langkah untuk membendunginya. Apakah inisiatif bagi mengurangkan hutang isi rumah yang kini tertinggi di Asia, iaitu pada kadar 87 peratus daripada KDNK.
29. PR-1331-L66601
Datuk Liang Teck Meng [Simpang Renggam] minta **MENTERI LUAR NEGERI** menyatakan:-
- (a) apakah peranan yang dimainkan oleh Malaysia dalam Institut Audit Tertinggi ASEAN, terutamanya apabila Malaysia menjadi Pengerusi ASEAN bagi tahun 2015 ini; dan
 - (b) bagaimanakah penglibatan Malaysia dalam ASEANSAI memberikan impak kepada pengauditan sektor awam.
30. PR-1331-L66259
Dato' Mohd Ariff Sabri bin Abdul Aziz [Raub] minta **MENTERI KEWANGAN** menyatakan:-
- (a) apakah kriteria yang digunakan untuk melantik Goldman Sachs mengurus penjualan bon 1MDB yang bernilai RM5 bilion pada kadar pulangan 5.75 peratus berbanding kos penjualan bon Petronas pada kadar 3.6 peratus, memandangkan reputasi Goldman Sachs terjejas di dalam skandal "*subprime loans*" di AS; dan
 - (b) adakah kadar 5.5 peratus ini terbaik untuk 1MDB.
31. PR-1331-L66182
Datuk Wira Haji Ahmad bin Hamzah [Jasin] minta **PERDANA MENTERI** menyatakan langkah-langkah yang telah dan akan dilaksanakan untuk mengatasi jurang kekayaan yang semakin melebar sekarang ini.
32. PR-1331-L66967
Tuan Er Teck Hwa [Bakri] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan jumlah rampasan minyak diesel mengikut negeri setiap tahun daripada 2010 hingga 2014.

33. PR-1331-L67098
Datuk Seri Panglima Haji Abdul Ghapur bin Haji Salleh [Kalabakan] minta **MENTERI DALAM NEGERI** menyatakan:-
- (a) apakah Kementerian maklum bahawa dadah jenis syabu sudah masuk ke dalam pelosok kampung di negara ini khususnya dalam kawasan Kalabakan; dan
 - (b) jika sedar, apakah tindakan yang telah, sedang dan akan diambil untuk membanteras secara total gejala yang amat memudaratkan ini.
34. PR-1331-L65546
Dato' Sri Haji Abdul Azeez bin Abdul Rahim [Baling] minta **MENTERI KESIHATAN** menyatakan bagaimana pihak Kerajaan memantau perkhidmatan atau servis di hospital-hospital Kerajaan terutamanya di kawasan luar bandar.
35. PR-1331-L67449
Dr. Ismail bin Daut [Merbok] minta **MENTERI KEMAJUAN LUAR BANDAR DAN WILAYAH** menyatakan berkenaan elaun sara hidup kepada golongan peladang, yang mana golongan ini tidak boleh diketepikan sepertimana yang diperoleh oleh golongan nelayan. Mereka berhak menikmati kemudahan tersebut lebih-lebih lagi di dalam suasana kejatuhan harga getah ke paras yang paling rendah pada ketika ini.
36. PR-1331-L65612
Laksamana Pertama Mohamad Imran bin Abd Hamid (B) [Lumut] minta **MENTERI PERTAHANAN** menyatakan berapa banyak jumlah kos yang perlu dibayar oleh Kementerian kepada kontraktor/pengusaha PLKN di seluruh negara akibat penangguhan program PLKN sepanjang tahun 2015 dan apakah nasib staf-staf yang bertugas dengan PLKN.
37. PR-1331-L65739
Tuan Ahmad Baihaki bin Atiqullah [Kubang Kerian] minta **MENTERI PERTANIAN DAN INDUSTRI ASAS TANI** menyatakan apakah peranan yang telah dimainkan oleh agensi-agensi Kerajaan yang bertindak sebagai orang tengah dalam perniagaan seperti PERNAS EDAR, FELDA NIAGA, FAMA, NAFAS dan lain-lain dalam menstabilkan harga barang-barang di Malaysia.
38. PR-1331-L65635
Dato' Haji Zainudin bin Ismail [Jelebu] minta **MENTERI DALAM NEGERI** menyatakan tindakan yang telah dan akan diambil terhadap mereka yang menghasut agar Sabah dan Sarawak keluar dari Malaysia seperti mana yang dilakukan oleh banyak pihak di Sabah dan Sarawak.

39. PR-1331-L66364
Tuan Lim Kit Siang [Gelang Patah] minta **MENTERI PENGANGKUTAN** menyatakan kesan projek penambakan laut projek Forest City (5000 ekar penambakan laut) dan Tanjung Piai Maritime Industrial Park (3000 ekar penambakan laut) terhadap keselamatan pelayaran di perairan Selat Johor yang berdekatan dengan laluan kapal perdagangan antarabangsa Pelabuhan Tanjung Pelepas dan laluan ratusan bot nelayan tempatan.
40. PR-1331-L67433
Dato' Seri Tiong King Sing [Bintulu] minta **MENTERI SUMBER ASLI DAN ALAM SEKITAR** menyatakan:-
- (a) apakah Jabatan Pengairan dan Saliran mempunyai rancangan yang rapi dan menyeluruh untuk membaiki dan menaiktarafkan sistem saliran di seluruh negeri Sarawak terutamanya di Bintulu; dan
 - (b) apakah punca utama kerja-kerja menaik taraf sistem saliran berbentuk langkah pencegahan di kawasan perumahan di Bintulu tidak dijalankan dengan tahap yang lebih cepat dan lancar sehingga mengakibatkan banjir kilat berlaku.
41. PR-1331-L65993
Dr. Ko Chung Sen [Kampar] minta **MENTERI KEWANGAN** menyatakan:-
- (a) bilangan dan peratusan individu yang membayar cukai pendapatan individu di negara ini; dan
 - (b) jumlah cukai yang dibayar oleh Perdana Menteri dan Timbalan Perdana Menteri dalam tempoh lima tahun yang lepas.
42. PR-1331-L65727
Dato' Kamarudin bin Jaffar [Tumpat] minta **MENTERI LUAR NEGERI** menyatakan adakah Malaysia bercadang untuk mengemukakan semula usul keahlian Palestin sebagai anggota Pertubuhan Bangsa-Bangsa Bersatu di Majlis Keselamatan PBB tahun ini.
43. PR-1331-L65777
Tuan Wilson Ugak Kumbong [Hulu Rajang] minta **MENTERI PERTANIAN DAN INDUSTRI ASAS TANI** menyatakan adakah terdapat sebarang perancangan untuk menubuhkan agensi-agensi di bawah Kementerian seperti FAMA bagi membangunkan aktiviti pertanian di kawasan Kapit dan Belaga.
44. PR-1331-L66001
Datuk Nur Jazlan bin Mohamed [Pulau] minta **PERDANA MENTERI** menyatakan langkah yang diambil Kerajaan bagi memastikan Jabatan Peguam Negara tidak melaksanakan pendakwaan terpilih ke atas mana-mana pihak mengikut Akta Hasutan dan nyatakan jumlah mereka yang sudah dan akan didakwa mengikut Akta Hasutan sejak 2013.

45. PR-1331-L66662
Tuan Loke Siew Fook [Seremban] minta **MENTERI PENGANGKUTAN** menyatakan status terkini perancangan pembangunan Swettenham Pier Cruise Terminal, Pulau Pinang dan bilakah ia dapat dilaksanakan untuk memacu pembangunan sektor "*cruise tourism*" seiring dengan matlamat dalam *Economic Transformation Programme*.
46. PR-1331-L66922
Dato' Ir. Haji Nawawi bin Ahmad [Langkawi] minta **MENTERI KEWANGAN** menyatakan hutang negara telah mengalami peningkatan sejak lebih 10 tahun yang lalu, apakah jenis hutang-hutang yang diambil kira dan apakah rancangan Kerajaan untuk memastikan hutang negara dalam nilai yang mampu dibayar oleh negara.
47. PR-1331-L66538
Tuan Tony Pua Kiam Wee [Petaling Jaya Utara] minta **MENTERI TENAGA, TEKNOLOGI HIJAU DAN AIR** menyatakan mengapa konsesi loji penjana kuasa telah ditawarkan kepada syarikat-syarikat yang tidak berkemampuan melabur dan tindakan yang akan diambil kepada syarikat 1MDB dan Malakoff yang gagal memulakan projek mereka. Adakah perjanjian mereka membolehkan Kementerian mengenakan penalti kewangan atau membatalkan kontrak tersebut.
48. PR-1331-L65569
Tuan Fong Kui Lun [Bukit Bintang] minta **PERDANA MENTERI** menyatakan kedudukan kewangan FELDA Global Ventures (FGV) sejak ia disenaraikan di Papan Utama melibatkan operasi hulu dan hiliran serta sambutan pelaburan-pelaburan baru.
49. PR-1331-L67358
Tuan Mohamed Hanipa bin Maidin [Sepang] minta **PERDANA MENTERI** menyatakan bilakah Kerajaan akan meminda Akta Mahkamah Syariah (Bidang Kuasa Jenayah) 1965 (pindaan 1984) bagi memberi kuasa kepada Mahkamah Syariah di negara ini melaksanakan undang-undang jenayah syariah mengikut undang-undang syarak yang sebenar sekali gus selaras dengan Indeks Syariah Malaysia yang dilancarkan oleh Perdana Menteri baru-baru ini.
50. PR-1331-L66213
Tuan Charles Anthony Santiago [Klang] minta **MENTERI DALAM NEGERI** menyatakan senarai projek yang telah menggunakan kepakaran Paul Phua Wei Seng dalam isu-isu yang melibatkan keselamatan negara. Adakah beliau dibayar.
51. PR-1331-L66588
Tuan Zairil Khir Johari [Bukit Bendera] minta **MENTERI SUMBER ASLI DAN ALAM SEKITAR** menyatakan bilangan orang yang ditangkap dan didakwa atas kesalahan pembalakan haram, diperincikan mengikut Semenanjung Malaysia, Sabah dan Sarawak.

52. PR-1331-L66904
Dr. Mohd Hatta bin Md. Ramli [Kuala Krai] minta **PERDANA MENTERI** menyatakan sebab pihak Peguam Negara gagal untuk membuat permohonan di Mahkamah Rayuan atau di Mahkamah Persekutuan bagi membuat jaminan tertentu untuk memastikan Sirul Azhar akan hadir dalam prosiding di Mahkamah Persekutuan sebagaimana yang pernah dibuat oleh Peguam Negara di dalam kes warga Australia, Bird Dominic.
53. PR-1331-L66462
Tuan William Leong Jee Keen [Selayang] minta **MENTERI PENGANGKUTAN** menyatakan tindakan-tindakan yang telah diambil untuk mendapatkan semula MH370 dan kerajaan mencadangkan untuk menamatkan usaha selanjutnya untuk mendapatkan semula pada Mei 2015.
54. PR-1331-L67125
Tan Sri Dato' Sri Dr. Jamaluddin bin Mohd Jarjis [Rompin] minta **MENTERI PEMBANGUNAN WANITA, KELUARGA DAN MASYARAKAT** menyatakan:-
- (a) usaha-usaha yang diambil oleh pihak Kementerian untuk membuka peluang-peluang baru bagi ibu-ibu tunggal menjana ekonomi mereka demi masa depan keluarga; dan
 - (b) bagaimana Kementerian boleh memastikan pengusaha-pengusaha daripada golongan ibu tunggal yang mampan dan berdaya maju mengembangkan industri-industri yang mereka ceburi bagi meningkatkan ekonomi mereka.
55. PR-1331-L67300
Tuan Haji Khalid bin Abdul Samad [Shah Alam] minta **MENTERI KEWANGAN** menyatakan mengapa pihak Kerajaan tidak membenarkan pihak Jawatankuasa Kira-Kira Wang Negara (PAC) untuk memanggil 1MDB atas kedudukan kewangan mereka atau diaudit oleh badan bebas yang berwibawa atau dilakukan audit oleh Jabatan Audit Negara.
56. PR-1331-L65995
Dr. Ko Chung Sen [Kampar] minta **MENTERI KEWANGAN** menyatakan:-
- (a) jumlah perbelanjaan Kerajaan untuk tujuan iklan di akhbar-akhbar arus perdana untuk tempoh lima tahun yang lepas; dan
 - (b) pecahan jumlah yang dibelanjakan untuk iklan dalam setiap surat khabar yang berkaitan.
57. PR-1331-L67369
Datuk Mas Ermieyati binti Samsudin [Masjid Tanah] minta **PERDANA MENTERI** menyatakan peratusan wanita dan lelaki yang telah berjaya mendapatkan akses bantuan guaman (*legal aid*) sehingga tahun 2014, serta apakah insentif yang diberikan kepada peguam yang terlibat dalam membantu Kerajaan dalam memberikan bantuan ini.

58. PR-1331-L65524
Dato' Fauzi bin Abdul Rahman [Indera Mahkota] minta **MENTERI PENDIDIKAN** menyatakan apakah Kementerian tidak berhasrat mengkaji semula dasar dan sistem pendidikan negara agar kita dapat melahirkan bukan sahaja insan yang berilmu tinggi, juga yang memiliki akhlak, iman dan amanah yang setimpal dengan peningkatan ilmu, dalam erti kata lain kita mahu menzahirkan graduan yang berilmu serta beramanah yang tinggi.
59. PR-1331-L67250
Tuan Julian Tan Kok Ping [Stampin] minta **MENTERI DALAM NEGERI** menyatakan jumlah kedai *reflexology centre* yang menjalankan mahupun menggalakkan kegiatan pelacuran yang telah pun dikenakan tindakan di kawasan Parlimen Bandar Kuching (P.195) serta Stampin (P.196) semenjak 2014. Senaraikan serta jumlah orang yang dikenakan dakwaan mahupun diberi amaran secara rasmi.
60. PR-1331-L66501
Tuan Anuar bin Abd. Manap [Sekijang] minta **MENTERI DALAM NEGERI** menyatakan:-
- (a) apakah keperluan dan kepentingan menteri menghantar surat kepada FBI untuk seorang tahanan atas tuduhan perjudian tidak sah di Amerika; dan
 - (b) apakah menteri akan mengeluarkan surat terhadap semua rakyat Malaysia yang ditahan di luar negara untuk keadilan kepada rakyat Malaysia.
61. PR-1331-L66614
Tuan Ramkarpal Singh a/l Karpal Singh [Bukit Gelugor] minta **MENTERI DALAM NEGERI** menyatakan sama ada tindakan undang-undang di bawah Akta Hasutan 1948, akan diambil terhadap Menteri Pertanian dan Industri Asas Tani, Datuk Seri Ismail Sabri Bin Yaakub berkenaan kenyataan beliau bahawa pengguna Melayu harus memboikot barangan yang dijual oleh peniaga Cina, dan sekiranya tidak, nyatakan alasan-alasannya.
62. PR-1331-L67199
Puan Kasthuriraani a/p Patto [Batu Kawan] minta **MENTERI PENDIDIKAN** menyatakan sebab mengapa sehingga kini cadangan untuk melaksanakan kurikulum Bahasa Malaysia yang sama dengan Sekolah Kebangsaan bagi pelajar SJKC dan SJKT bermula dengan pelajar Tahun Empat pada 2014 belum lagi di implementasi dan adakah Program Memartabatkan Bahasa Malaysia boleh membantu usaha ini.
63. PR-1331-L65702
Datuk William @ Nyallau anak Badak [Lubok Antu] minta **MENTERI KESIHATAN** menyatakan setakat mana pelaksanaan pembinaan klinik kesihatan Lubok Antu dibuat seperti kelulusannya yang diumumkan oleh YAB. Perdana Menteri dalam pembentangan bajet untuk 2015 yang lalu.

64. PR-1331-L66912
Tuan Abdullah Sani bin Abdul Hamid [Kuala Langat] minta **MENTERI SUMBER MANUSIA** menyatakan tindakan terhadap syarikat yang terbukti mengamalkan "UNION BUSTING".
65. PR-1331-L66630
Tuan Ahmad Marzuk bin Shaary [Bachok] minta **MENTERI KESIHATAN** menyatakan jumlah hospital di dalam negara mengikut negeri, jajahan dan tahun pembinaan serta kawasan-kawasan yang sangat memerlukan kemudahan hospital. Apakah perkembangan terkini pembinaan Hospital Bachok. Apakah tidak menjadi keutamaan kepada Kementerian untuk ia disegerakan.
66. PR-1331-L65962
Dr. Che Rosli bin Che Mat [Hulu Langat] minta **PERDANA MENTERI** menyatakan jumlah peruntukan yang dikeluarkan oleh Majlis Keselamatan Negara (MKN) dalam membantu negeri-negeri yang menghadapi bencana banjir akhir tahun 2014 dan awal tahun 2015 dan langkah-langkah yang diambil dalam membantu memulihkan kehidupan rakyat pasca banjir terutama yang melibatkan kehilangan rumah kediaman.
67. PR-1331-L66553
Puan Rubiah binti Haji Wang [Kota Samarahan] minta **MENTERI PERTANIAN DAN INDUSTRI ASAS TANI** menyatakan jenis dan kadar bantuan yang diberikan oleh Kementerian kepada para nelayan dan petani yang menghadapi tragedi banjir bulan lepas di Sarawak dan di Kota Samarahan khususnya.
68. PR-1331-L65938
Dato' Dr. Nik Mazian bin Nik Mohamad [Pasir Puteh] minta **MENTERI PERTANIAN DAN INDUSTRI ASAS TANI** menyatakan berapakah jumlah kerugian dalam sektor pertanian kesan daripada banjir yang melanda negeri Kelantan dalam tahun 2014. Apakah langkah-langkah dan bantuan Kerajaan melalui Kementerian ini dalam usaha membina-semula kerosakan dan kerugian dalam sektor pertanian ini.
69. PR-1331-L67283
Dato' Seri Abdul Hadi bin Awang [Marang] minta **MENTERI PERDAGANGAN ANTARABANGSA DAN INDUSTRI** menyatakan apakah perkembangan terkini proses rundingan TPP dan sejauh mana Malaysia memperoleh manfaat daripada perjanjian tersebut.
70. PR-1331-L67281
Dato' Haji Mahfuz bin Omar [Pokok Sena] minta **MENTERI DALAM NEGERI** menyatakan apakah bentuk bantuan yang diberikan oleh Paul Phua kepada Kerajaan Malaysia di dalam projek-projek yang berkaitan keselamatan negara seperti yang dimaklumkan YB Menteri Dalam Negeri kepada FBI di dalam surat bertarikh 18 Disember 2014 dan nyatakan apakah projek-projek keselamatan tersebut.

71. PR-1331-L67144
Tuan Jeff Ooi Chuan Aun [Jelutong] minta **MENTERI PERTAHANAN** menyatakan sama ada Malaysia bersedia untuk menghantar pasukan tenteranya untuk menyertai kempen antarabangsa memerangi ISIS di medan krisis.
72. PR-1331-L65872
Datuk Raime bin Unggi [Tenom] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan jumlah rumah dalam Program Perumahan Rakyat di Sabah pada tahun 2013, 2014 dan 2015.
73. PR-1331-L65725
Datuk Dr. Makin @ Marcus Mojigoh [Putatan] minta **MENTERI PELANCONGAN DAN KEBUDAYAAN** menyatakan:-
- (a) apakah tindakan pihak Kementerian dalam memperkasakan produk pelancongan luar bandar tempatan yang berasaskan pertanian "*home stay*" dan tarikan pelancongan lain seperti Empangan Bakun; dan
 - (b) program galakan bagi usahawan luar bandar untuk berkecimpung dalam industri pelancongan.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. **Menteri Kewangan**

- * Rang Undang-undang Perbekalan Tambahan (2014) 2015.

*Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Usul dibuat oleh Yang Berhormat Datuk Seri Noh bin Haji Omar [Tanjong Karang]** dan masalah dicadangkan :-

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Ketiga, Parlimen Yang Ketiga Belas.”

Menyambung semula Perbahasan atas masalah (19 Mac, 2015)

- | | | | |
|----|----------------|--|-------------------------------|
| 2. | (D.R. 24/2014) | Rang Undang-undang Dadah Berbahaya (Pindaan) (No.2) 2014

[Menteri Kesihatan] | Bacaan Kali Yang Kedua |
| 3. | (D.R. 29/2014) | Rang Undang-undang Pendidikan (Pindaan) 2014

[Menteri Pendidikan] | “ |
| 4. | (D.R. 26/2014) | Rang Undang-undang Perhubungan Perusahaan (Pindaan) 2014

[Menteri Sumber Manusia] | “ |
| 5. | (D.R. 30/2014) | Rang Undang-undang Teknologis dan Juruteknik 2014

[Menteri Sains, Teknologi dan Inovasi] | “ |
| 6. | (D.R. 23/2014) | Rang Undang-undang Ahli Parlimen (Saraan) (Pindaan) 2014

[Perdana Menteri] | “ |

7. Menteri Kewangan akan mencadangkan :-

"Bahawa Dewan ini, mengikut peruntukan perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM39.592 bilion wang terimaan Terbitan Pelaburan Kerajaan (TPK) yang diterima di bawah seksyen 3(1) Akta yang sama ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut."

8. PR-1331-U65762

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, agama Islam adalah agama rasmi negara ini, namun kebebasan beragama di negara ini terjamin seperti yang termaktub dalam Perlembagaan Persekutuan. Dan mengambil maklum juga, isu agama adalah merupakan isu sensitif terutama sekali dalam negara yang berbilang kaum dan agama. Dan mengambil maklum juga bahawa, penukaran agama bagi mereka yang di bawah umur memerlukan persetujuan daripada ibu bapa mereka terlebih dahulu sebelum mereka menukar agama. Dalam kes penukaran agama anak perempuan (berumur 16 tahun) Encik Jilius Yapoo yang berlaku di Sekolah Menengah Kinarut dengan tanpa persetujuan ibu bapa kanak-kanak ini telah mengundang spekulasi dan andaian yang tidak sihat terutama sekali kepada perpaduan kaum dan agama di negara ini. Insiden ini sedikit sebanyak telah menghakis dan melunturkan kepercayaan rakyat (terutama sekali yang bukan beragama Islam) terhadap institusi sekolah sebagai pusat ilmu dan juga kepada sistem perundangan negara, di mana kebebasan beragama adalah terjamin seperti yang termaktub dalam Perlembagaan Persekutuan. Maka, bagi menangani masalah ini, Dewan yang mulia ini hendaklah mengambil ketetapan bahawa, mana-mana pihak yang cuba untuk menukar agama mereka yang di bawah umur atau mana-mana individu yang di bawah umur hendak menukar agama mereka, pihak tersebut hendaklah mendapatkan persetujuan bertulis lebih awal daripada ibu bapa individu tersebut. "

[Perdana Menteri]

9. PR-1331-U65853

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum, terdapat rungutan-rungutan di kalangan rakyat negeri Sabah dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau diendahkan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke negeri Sabah dan ditambah buruk pula dengan pemberian status warga negara kepada mereka ini. Dan mengambil maklum juga bahawa, setiap kali isu 20 perkara dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai ke satu tahap di mana mereka secara terbuka

menggelarkan diri mereka sebagai aktivis Sabah Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan undang-undang semata-mata untuk menghalang mereka bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan lagi keadaan di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak prihatin dan kuku besi. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara holistik termasuklah menjemput dan mendengar rungutan mereka ini."

[Menteri Dalam Negeri]

10. PR-1331-U65760

Tuan M. Kulasegaran [Ipoh Barat] akan mencadangkan:-

"Bahawa Dewan Rakyat ini mengambil maklum bahawa banjir telah melanda di beberapa negeri baru-baru ini, di mana harta benda rakyat telah dimusnahkan dan banyak nyawa telah terkorban. Dalam keadaan ini, Dewan ini mengarah Perdana Menteri supaya mengambil strategi jangka masa panjang untuk mengatasi masalah ini dengan segera."

[Perdana Menteri]

11. PR-1331-U66345

Dr. Tan Seng Giaw [Kepong] akan mencadangkan:-

"Bahawa Dewan ini membahaskan banjir besar di negara."

[Perdana Menteri]

12. PR-1331-U66346

Dr. Tan Seng Giaw [Kepong] akan mencadangkan:-

"Bahawa Dewan ini mendebatkan gerakan militan di Malaysia."

[Menteri Dalam Negeri]

13. PR-1331-U67135

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis Diraja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

[Menteri Dalam Negeri]

14. PR-1331-U67141

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Menteri Pendidikan]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2015</u>	<u>RISALAT/DOKUMEN</u>	<u>TARIKH DIBENTANGKAN</u>
CMD. 1	Anggaran Perbelanjaan Mengurus Tambahan Kedua, 2014	23 Mac 2015
CMD.1A	Memorandum Perbendaharaan Mengenai Anggaran Perbelanjaan Mengurus Tambahan Kedua Tahun 2014 Bagi Kerajaan Malaysia	23 Mac 2015
CMD. 2	Anggaran Perbelanjaan Pembangunan Tambahan Pertama, 2014	23 Mac 2015
CMD. 2A	Memorandum Perbendaharaan Mengenai Anggaran Perbelanjaan Pembangunan Tambahan Pertama 2014 Bagi Kerajaan Malaysia	23 Mac 2015
CMD. 3	Penyata Keluaran Wang Daripada Kumpulan Wang Luar Jangka Bagi Tempoh Dari 1 Januari 2014 Hingga 31 Disember 2014, Menurut Peraturan 68 Di Bawah Peraturan- Peraturan Majlis Mesyuarat Dewan Rakyat	23 Mac 2015
ST.8	Penyata Keluaran Wang Daripada Simpanan Luar Jangka Bagi Tempoh Dari 1 Januari 2014 hingga 31 Disember 2014 Menurut Peraturan Seksyen 6(3) Akta Kumpulan Wang Pembangunan 1966	23 Mac 2015